

聖

武

記

聖武記卷九

邵陽魏源撰

嘉慶川湖陝靖寇記一

國家極盛于乾隆之六十年版輿生齒倍雍正四夷賓服逾康熙外寧則內蘖始釁于湖南貴州紅苗越明年授受禮成

太上皇帝訓政宣重光而湖北四

川教匪旋起蔓延河南陝西甘肅是時彗星出西方長數丈逾年不滅乘

新政之宵旰與五省環攻之兵

力且撫且剿猶七載而後定靖餘孽者又二載先後糜餉逾萬萬金視伊犁回部大小金川幾再倍過之且前

代流寇皆發難末造川壅必潰未有蠢動于麗豫之餘
勞師殫武如今日者心腹患甚四支內訌急于邊陲痛
深者其懲切創鉅者其踰遲宜昭示起事之顛末與終
事之難劬俾後御民者咸知懷朽索戒持盈益洪延我
丕丕基而方略繁重四百卷士大夫望洋瞠目耆宿老
將漸盡其曷以詔後故臣於是篇所載

廟算將略

兵形地勢特詳云白蓮教者奸民假治病持齋爲名僞
造經咒惑衆斂財而安徽劉松爲之首乾隆四十年劉
松以河南鹿邑邪教事發被捕遣戍甘肅復分遣其黨
劉之協宋之清授教傳徒徧川陝湖北日久黨益衆遂

謀不靖倡言叔連將至以同教鹿邑王氏子曰發生者
詭明裔朱姓以煽動流俗乾隆五十八年事覺復捕獲
各伏辜王發生以童幼免死戍新疆惟劉之協遠颺是
年復跡于河南之扶溝不獲于是有

旨大索州縣

吏奉行不善逐戶搜緝胥役乘虐而武昌府同知常丹
葵奉檄荊州宜昌株連羅織數千人富破家貧陷死無
算時川湖粵貴民方以苗事困軍興而無賴之徒亦以
嚴禁私鹽私鑄失業至是益讎官思亂奸民乘機煽惑
于是發難于荆襄達州駸淫于陝西而亂作也正月湖
北荊州之枝江宜都則有聶傑人張正謨等賊起宜昌

之長樂長陽應之二月東湖當陽遠安賊起而林之華
陷當陽湖廣總督畢沅湖北巡撫惠齡調兵三千剿荆
州之賊 上命西安將軍恆瑞領滿兵二千由興安
鄖陽進剿當陽之賊是月總兵富志那禽聶傑人于枝
江而襄陽鄖陽宜昌施南荆門州各山賊起三月襄陽
賊姚之富與教首齊林之妻王氏陷竹山保康而施南
之來鳳亦陷于賊擾及四川酉陽 上命都統永保
侍衛舒亮鄂輝至軍復調陝西廣西山東兵五千會剿
恆瑞復竹山四月畢沅 奏官兵先後殺賊不下數
萬而賊起益熾 止乃責永保恆瑞以竹山保康之

賊畢沅舒亮以當陽遠安東湖之賊惠齡富志那以枝
江宜都之賊鄂輝以襄陽穀城均州光化之賊四川總
督孫士毅以酉陽來鳳之賊時襄賊焚呂堰驛蔓延鄧
州新野合隊攻樊城永保 奏言襄陽賊數萬最猖
獗界連河南賊首姚之富齊王氏劉之協皆在其中爲
四方羣盜領袖襄賊破則羣盜自瓦解宜俟諸軍集合
力分攻 詔明亮鄂輝赴襄陽 命直隸提督慶

成山西總兵德齡各以兵二千會之又赦蒙古竊馬謫
犯之在湖廣河南者從軍以助騎隊五月畢沅圍當陽
數月不下惠齡剿枝江賊亦無效屢以大雨爲解

上切責之而歸州巴東安陸京山隨州咸豐皆賊壘恆
瑞永保明亮鄂輝由樊城分攻呂堰雙溝賊巢賊已分
擾孝感東距漢陽百餘里幸爲大遼所隔武昌戒嚴

上以畢沅惠齡頓兵久六月

命永保總統湖北

諸軍俾先靖襄陽而後分攻孝感長陽兩路時參將傅
成明等擊孝感賊遇伏敗死永保令明亮馳救孝感復
請調湖南苗疆兵二萬前來七月陝甘總督宜綿提督
慶成破鄖陽之賊殲其首從

奏請移陝兵助剿當

陽會畢沅舒亮已破當陽惠齡已破賊枝江而明亮亦
殲賊孝感漢陽始無恐時福寧代孫士毅督四川未行

與荊州將軍觀成破龍山之賊于旗鼓寨投出二千餘人福寧誘令入城領衣糧盡坑之以臨陣殲戮奏

詔加太子太保及嘉慶四年七月發覺以殺降邀功褫職逮治云八月永保等破襄賊于隨州之紅土山俱會兵鍾祥明亮奏言鍾祥賊巢穴宜四面夾攻以防漏網今永保以九千餘兵由北追壓而南路要截之兵止三千餘難杜竄逸詔責永保擁衆自衛明

亮敗賊土門沖永保復不能夾擊時鍾祥皆襄陽之賊南犯不遂仍轉而北明亮追敗之復與永保等邀擊于雙溝並分兵扼呂堰棗陽防其北逸追至河南界之淖

沱鎮賊分奔唐縣倉臺官兵勞頓請增調山東直隸兵
四千復簡健銳火器營兵各一千前往九月宣勇伯和
琳卒苗疆

詔明亮鄂輝馳回湖南惠齡福寧移師
榔平以次剿長陽歸巴時榔平賊林之華與覃加耀合
犯滋邱在長陽關之南而畢沅防守襄陽河南巡撫景
安防禦鄧州是時湖北賊北惟襄鄧南則歸宜勢漸蹙
而十月四川達州奸民徐天德等激于胥役復與大平
東鄉賊王三槐冷天祿等並起初四川有囑匪而無教
匪囑匪者金川之役官兵潰于木果木其逃卒之無歸
者與失業夫役無賴悍民散匿川東北剽掠爲生及官

捕急則以白蓮教爲逋逃藪。又湖北襄陽敗賊多竄入川。皆陝楚籍居三之二。故一旦揭竿戰鬪如素習。而川東數州縣皆界連漢南大小巴山。袤延千餘里。賊巢踞其中。四川總督英善。成都將軍勒禮善。剿之陝西巡撫秦承恩。防禦興安。皆無敢疾馳掩其烏合者。于是畢沅力請罷湖南苗疆兵。移剿教匪。上以苗事未靖。不

許。是月福寧觀成等破賊滋邱。賊奔長陽之黃柏山。總兵黃瑞以守河疏防。褫逮治罪。總兵文圖成德從征。戴罪惠齡等禽覃士潮于枝江。亦會剿黃柏山。而川賊日熾。由太平入陝。分犯興安之安。康平利。紫陽。十一月陝

甘總督宜綿破賊興安城外移剿洞汝河之賊四川總督英善等亦屢敗達州東鄉之賊東鄉賊乘霧犯官兵總兵袁國璜何元卿俱戰死而永保會諸軍剿襄賊于唐縣姚之富已分犯棗陽復渡滾河而西蹂呂堰向光化穀城圍巡撫景安于鄧之魏家集二日官兵始至

上以永保擁京營勁旅及大兵萬餘徒尾追不迎擊致賊東西橫躡無忌逮入都治罪慶成舒亮等戴罪効力
命惠齡總統軍務惠齡
奏言襄鄧平行二

千里無險阨可合圍且賊習地形必不自趨絕地惟有嚴防漢江潛渡並堰唐河白河盡移難民于河西守岸

團練庶可衛民而蹙賊時賊分二路每路二萬餘一姚之富齊王氏等向東南恆瑞等追之一張漢潮劉起榮等向東北惠齡慶成等追之復南與姚之富合惠齡恆瑞約夾攻于興隆集破斬二千時陝督宜綿亦敗賊漢北並敗漢北救援之賊移攻漢南之洞汝二河賊已并入洞河之五作雲據險固守我兵乘雪夜遶出後山火其寨鄭陽賊略定詔宜綿馳赴達州而川督英善等亦禽徐天富于太平此嘉慶元年畢沅永保督湖北宜綿督陝西福寧英善督四川時羣賊初起之事也

嘉慶川湖陝靖寇記二

二年正月湖南苗事略定領侍衛內大臣威勇侯額勒
登保奏移荊州將軍興肇兵四千回襄陽總兵張廷彥
兵二千餘赴長陽黃柏山都統德楞泰將軍明亮率兵
六千赴達州助剿川湖陝三路之賊時惠齡一路惟提
督慶成力戰惠齡奏官兵分三哨殲襄賊三千于趙家
岡又分五哨殲襄賊四千于淡家岡又分三哨追截禽
斬二千餘俘賊首劉起榮餘賊僅數千勢漸蹙而景安
擁兵四千屯南陽不出一卒截擊賊窺北面可乘遂三
路分犯河南其北路則王廷詔焚葉縣之保安驛圍官

兵于裕州。景安興肇尾追之。西路則李全由信陽轉應山。隨州向確山。趨浙川。奔盧氏。慶成剿之中路。則姚之富齊王氏出南陽。掠嵩縣。山陽。惠齡等剿之。賊入河南。後虜脅日衆。不整隊。不迎戰。不走平原。惟數百爲羣。忽分忽合。忽南忽北。以率我兵。勢而慶成所追之賊益西。由內鄉。盧氏諸山。進偃武關。商維所至。驅脅復有商南。新起賊五六千應之。姚之富齊王氏皆追及于鄖西。連兵西上。將由陝入川。離河南西境三百里。時景安避賊駐軍內鄉。賊入陝後二十餘日。景安始至。而惠齡亦于慶成收復十餘日後始抵鄖西。慶成約恒瑞夾擊于漢。

北恒瑞以新有秦賊辭又阿爾薩朗奉檄赴邸西亦逗
留不至俱奉 旨詰責御史宋澍奏言惠齡奏殲楚

賊不下數萬何以至今蠭聚景安防禦南陽逾年何以
任賊橫行秦承恩近屯興漢何以武關全陝門戶曾不
設備豈非各分畛域懷觀望乞專簡大臣督師三省庶
呼應靈而事權一四月 詔責諸將曰去歲邪教起

長陽未幾及襄陽未幾及巴東歸州未幾四川達州繼
起至襄陽一賊始則由湖北擾河南繼且由河南入陝
西若不亟行掃蕩非但老師糜餉且多一日蹂躪卽多
一方瘡痍各將軍督撫大臣身在行間何忍負無區畫

若謂事權不一則原以襄陽一路責惠齡達州一路責
宜綿長陽一路責額勒登保福寧若言兵餉不敷已先
後調禁旅及鄰省兵數萬且撥解軍餉及部帑不下三
千餘萬昔明季流寇橫行皆由閹宦朋黨文恬武嬉橫
征暴斂厲民釀患今則紀綱肅清勤求民隱每遇水旱
不惜多方賑卹且普免天下錢糧五次普免漕糧三次
蠲免積逋不下億萬萬此次邪匪誘煽不過烏合亂民
若不指日肅清其何以奠九寓而服四夷其令宜綿惠
齡額勒登保等各奏用兵方略及刻期何日平賊并賊
氛所及州縣若干難民歸復若干瘡痍輕重共十分之

幾善籌安卹以間旋

諭河南被賊最重之十五州

縣免兩年應征錢糧其間被蹂躪之五縣分三年帶征其旁近供軍需之二十三州縣分二年帶征自後川陝湖北屢年蠲卹視此不悉書時姚之富由商州犯孝義廳地通藍田爲入西安要路秦承恩扼秦嶺禦之惠齡慶成由山陽追擊賊南走鎮安與李全王廷詔合掠洵陽安康時官兵鄉勇已守漢岸柯藩亦防禦洵陽賊不能渡漢將由北岸直趨漢陰石泉渡上游以合川賊惠齡等約恒瑞夾攻于黃龍壩轉戰一晝夜奏殺賊三千賊復東西遁恒瑞東追惠齡西追柯藩奏言襄鄖賊分

路前來臣防守興安府城兵止二百其前所調赴漢中邀擊之同兵二千爲督臣陸有仁檄止至今未至惟急催秦承恩惠齡軍速進會剿

上嚴詰陸有仁逮至

京命英善馳督陝甘宜綿移督四川而襄賊三路已并爲一由漢陰至紫陽奪船渡漢後五日惠齡始至恒瑞尙未至

上震怒詰責惠齡恒瑞秦承恩慶成

柯藩等追賊不力防漢不嚴盡奪世職孔雀翎戴罪効力命宜綿總統川陝軍務惠齡等悉聽節制時漢北已無賊其防堵各兵分赴漢南追剿并

命湖廣

提督劉君輔移兵竹山竹谿以備大寧川賊入楚六月

襄賊旣渡漢復分三路入川其兩路由通江入巴州欲合方家坪羅冉等賊其一入太平城口欲合達州大寧二賊宜綿奏言官兵利合不利分賊利分不利合且川楚賊雖同教黨各不同計三賊必各據一隅以牽制我乃議分兵三千令德楞泰追剿達州逸賊而白同明亮率大兵赴中河後河會穆克登阿柯藩先剿通江東鄉兩賊再赴太平城口與惠齡劉君輔兩路會攻并檄惠齡畱兵四千守陝界防其同竄時襄賊每軍先後分數隊且戰且走以綴官兵宜綿柯藩兩軍遇賊賊皆不迎戰卽越山遁散則匿箐聚則據險日數變適明亮兵截

其後隊惠齡慶成等騎兵截其前隊各有斬戮而太平城口之賊王廷詔等因鄉勇扼其赴大寧之路亦折而南分屯前河及開縣城外適德楞泰追徐王二賊亦至前河與中河後河之襄賊相近四賊約會一地雖達賊屢敗後止餘二千而襄賊數萬宜綿令穆克登阿間道援德楞泰會德楞泰方擊徐天德等于白秀山楚賊三隊合兵來援突出山溝分青白藍爲號步賊前騎賊後鏖戰逾時始分屯山岡延亘三十餘里是夜宜綿明亮慶成柯藩等兵皆會次日復戰各殺賊數百賊復還開縣惟李全與徐王二賊合屯溫湯井與太平城口之賊

合姚之富等大隊俱屯南天洞各首逆皆在焉乃分兵
勇三千令副將長春剿溫湯井而大軍分趨南天洞各
賊惠齡舒亮亦自後河城口馳至三面會攻適屢獲生
賊知襄賊惟李全畱川其餘將盡還湖北乃檄沿漢江
之船盡移上游賊以官軍扼其北竄乃分犯大寧雲陽
萬縣號召邪黨而東宜綿遣兵分防要害而明亮德楞
泰等躡賊後各路兵齊抵雲萬交界賊據山巔官軍四
面進攻斬賊千餘其雲萬間新起響應之賊或千餘或
數千官軍乘時撲滅襄賊分二路一王廷詔等由夔州
將西合大寧賊惠齡恒瑞慶成等追之一姚之富齊王

氏直犯夔州。明亮德楞泰使總兵達音泰先據白帝城。賊來爭先以三百騎嘗營而伏賊數千于山谷。出突官兵奮擊卻之。賊夜復圍攻甚急。明亮德楞泰親馳救。始退。次日三路直犯大營。皆持盾以捍矢銃不退。我兵乘礮勢壓下。短兵格戰。斬首數百。賊復回突白帝城。乃截殲其前隊五百。其後賊三千餘。猶然炬夜攻。更番迭戰。四更始敗走。下趨巫山。又有新起賊應之。達音泰馳往營城外。賊兩路各數千。且戰且攻城。卻而復前者三。明亮等乃畱興肇守夔。而率大軍援巫。賊復走歸巴。明亮等聲言由陸馳追。而登舟東下。七月四日至巴東。則賊

已在隔江江北歸州無城垣姚齊二賊方屯巴歸之界而後隊賊王廷詔等萬餘復至焚掠巴東對岸之石門聲言欲南渡攻縣治明亮等信之回軍攻石門賊先克其三營斬賊數百次日復進攻則全賊已竄惟畱千賊于後以綴官兵未戰卽走且謀報前屯歸巴交界之賊已乘間陷興山兩路賊約會宜昌荊州同赴襄陽乃移興肇守歸州而德楞泰由水路徑趨荊州明亮由陸赴宜昌約夾剿于當陽時襄賊自入川與達賊會後復有新賊響應衆頓數萬分兩路還楚首隊齊王氏約二萬餘由興山保康趨南漳以向襄陽後隊王廷詔趨當陽

遠安向荊州湖北巡撫汪新遣兵一守房縣保康以防
襄一守東湖當陽以防荊并調荊州滿兵守萬城隄以
防盜決而大兵後壓并檄各鎮將據險驅偪入山合圍
拚擊又奏言襄陽爲南北衝要各賊盡還湖北其在雲
陽開萬間者不過新起附從之黨目下大兵雲集而分
防兩省州縣已約二萬餘其備戰之兵川省則惠齡等
五千餘舒亮五千餘百祥朱射斗四千餘觀成劉君輔
二千宜綿二千及新調甘肅兵二千回兵五百其在湖
北者惟額勒登額等七千明亮五千已調湖南苗疆兵
千餘助之並乞飭催所調東三省兵速赴襄陽時

詔發吉林黑龍江索倫兵三千令侍衛惠倫都統
阿哈保以木蘭進哨兵百餘爲先鋒并解察哈爾馬八
千匹赴河南湖北時襄賊分二路王廷詔聲言向荊州
明亮等連破之宜昌遠安城外復扼荊門州以待之齊
王氏等向襄陽總兵王文雄擊于南漳賊佯退次日復
倍道分進由宜城鍾祥北走襄樊

詔景安赴樊城

漢江戒嚴八月襄賊分三路皆北犯每路相距百餘里
明亮等邀擊宜城東北適阿哈保等統進哨兵至自北
夾攻追奔二十里賊竄入山初荊州城外十五里之沙
市水陸輻輳向無城垣聞賊警逃散一空自是士民捐

集夫役于南面臨江。樹木柵而東西北三面。周十餘里。築堡環濠捍衛。此外衝要市鎮一律仿修。其襄陽對岸之樊城亦以無城猝遭焚掠。畢沅汪新屢議修復未果。近亦于東西北三面循舊址築土堡而沿江樹柵。故此大賊過襄陽潛謀偷渡。居民賴以無恐。其漳宜二路之賊窺荆襄不遂。復折回房竹。佯走陝西。欲引官兵追入山而乘間北渡。漢明亮等擊賊茨河鎮。賊分路來犯。馬步約七千。官兵分據山岡夾攻。斬賊千二百。時漢防甚嚴。賊不能北渡。復西竄。前隊掠白河。洵陽。愈追愈西。明亮等邀擊于鄖西。勁騎五路衝之。奮斬二千。賊蹈溝內。

積尸而遁。惠倫及豐仲布戰死。九月前。雷川之襲賊李全。復自巴州與王三槐分黨。欲由陝舊路還楚。沿漢東走慶成。登舟下漢。以邀其前。恒瑞惠齡由陸躡其後。夾攻賊于紫陽。復礮退賊騎。涉漢者于汝河。慶成遂一晝夜抵興安。時東西兩路賊相會于興安南岸。而惠齡恒瑞及明亮德楞泰兩軍亦先後追至。會剿諸將議以賊東竄不遂。必渡漢而北。乃令柯藩以兵千五百助秦承恩守興安。惠齡富成以兵三千循漢南而西。與明亮等夾擊。時竹山竹谿鄉勇各萬人殺賊有功。詔發花翎五藍翎十命。景安分賞出力者。自襄賊起事騷擾皆

在漢北及賊由川還楚入陝復經漢南之宜昌荆門安陸襄陽鄖陽焚掠十八州縣而房保二竹瘡痍尤重又長陽一賊由施南奔巴東往還蹂躪幾千里

詔分

別蠲卹有差明亮德楞泰奏言臣等自楚入陝所經村莊皆已焚燼蓋藏皆已搜劫男婦皆已虜掠目不忍見已擾者固宜安卹未擾者尤宜隄防查各州縣在城之民有城池以保障是以賊匪皆不攻城其村落市鎮僅恃一二隘口鄉勇或遠不及防或間道失守倉皇逃避不但衣糧盡爲賊有且備衛之火藥器械反以藉寇而資盜而各賊所至之處有屋舍以棲止有衣食火藥以

接濟有驟馬芻草以奪騎更換有偏脅之人爲之鄉導
負運是以自用兵來所殺無慮千萬而賊不加少且兵
力以保城爲急則村市已被虔劉以保荆襄爲急則房
竹安康已難兼顧爲今之計欲困賊必須衛民莫若飭
近賊州縣于大鎮市勸民修築土堡環以深溝其餘因
地制宜或十餘村爲一堡或數十村爲一堡賊近則更
番守禦賊遠則乘暇耕作如此以逸待勞賊匪所至野
無可掠夜無可棲敗無可脅加以大兵乘壓其後殺一
賊卽少一賊滅一路卽清一路近日襄陽紳士梁有穀
等築堡圍守賊屢攻不能犯此保障之成效至川東各

屬多有險峻山寨祇須令鄉民臨時移守其中一如守
堡之法于以禦賊安民必可刻期撲滅奏上雖奉

旨以築堡煩民不如專禽首逆而堅壁清野之議實始
此又 詔曰昨已令勒保馳督湖廣宜綿亦本爲總

統但勁兵健馬俱在明亮德楞泰一路其所剿姚之富
齊王氏二賊尤賊中首逆朕所盼望惟明亮德楞泰二
人不得因有總統總督稍存觀望此外四川賊王徐羅
冉等責成宜綿巴東賊覃加耀等責成額勒登保大寧
老木園賊陳崇德責成觀成劉君輔安康賊李全責成
惠齡恒瑞慶成各辦各賊原不相統不拘何路禽賊卽

此路將帥之功何路養賊卽此路將帥之罪其各自爲
戰十月姚之富李全由平利分道而南欲引明亮德楞
泰大軍入山而王廷詔等由安康北犯興安適惠齡擊
郤之復追擊于漢南山內先後禽斬二千餘賊不得渡
漢復奔紫陽石泉乃使恒瑞以兵四千還漢中與宜綿
夾剿其明亮德楞泰所追平利之賊日夜長驚向大寧
以劉君輔兵勇扼雞心嶺斷其去路折回鎮平迎敵大
軍明亮德楞泰以精兵陳峽口而伏兵左右山勁騎衝
擊斬賊千百并伏兵各路山溝均斬數百又扼澍河口
走路賊合屯高壩保險不出乃佯撤澍河口之兵設數

伏而官兵他道偪之。賊萬餘果趨澍河口。伏四起。衝賊爲五首尾。不相顧。斬賊數千。轉坂下竄者三千餘。涉河入箐者千餘。初賊之入陝楚也。每路皆稱齊王氏姚之富。以煽衆。及是。詰知姚齊二賊已入安康。賊隊而此路則張漢潮等六賊已殲其二。餘賊三路狂奔。所過皆剗道壞梁礪木石。官兵亦羸糧架阻。窮日分躡。及之緞子坪。賊復合爲一。將及惠齡所。追前賊北竄。適前賊爲恒瑞敗諸西鄉。而惠齡兵由漢南追襲。值後二賊復至。惠齡慶成伏兵堰口左右。而陳騎兵于山岡。俟賊前隊過半。聞礮起。衝賊斷爲數隊。斬殺無算。賊復奔入山。十一

月明亮惠齡等復約殲賊後隊二千于白河峽幾盡而姚齊李高張王諸首逆已均合于前路踰大巴山連營二十餘里分隊迭戰更番在前姚之富齊王氏爲一軍王延詔高均德爲一軍李全樊人傑爲一軍張漢潮劉永泰爲一軍以川北路險人煙少難虜掠欲回陝楚富庶之地且寧河以上漢源愈淺冬涸可涉諸將遣兵扼襄城棧各渡口擊賊半濟截斬千餘又合攻賊南岸山內奪斬二千餘賊益西趨寧河官兵夜伏沮水市令回兵假鄉勇旗誘之而官兵兩山壓攻追斬三千又破斬賊二千于寧羌州城外賊復走長寨渡口適索倫勁騎

甫抵漢中與大兵夾擊賊反奔山等我軍舍騎分追入川盡移漢北防兵于漢南川北十二月襄賊因漢中大兵雲集不能北竄復分道入川明亮等大軍趨通江惠齡等亦繞入太平遏其東竄賊分路誘大兵入川其高均德等卽間道折回寧羌陝界官兵邀之佯向廣元與川北賊合誘官兵東南而乘間踰山北趨廣元棧道明亮等以東北之黃柏壩爲入陝要隘乃分兵護輜重佯向獨山而引精兵馳伏壩口賊果長驅入隘突起截殪千餘賊分竄入等北走寧羌明亮輕騎邀之廣元城外適德楞泰追齊王氏至會攻于黃墳驛乘銳追入山內

復折回廣元寧羌而高均德已竊渡漢北明亮等議以賊情則齊王氏首逆以地勢則高均德將東驚興安擾豫楚而景安秦承恩等防守步兵不能馳擊遂舍齊王氏率大兵八千馳赴漢中上大怒責明亮德楞泰舍重就輕墮賊計使齊王氏得乘間北渡盡奪世職紫羅孔雀翎戴罪立功其四川之賊自正月初達州徐天德王三槐合陷東鄉害副都統佛住以下復結巴州賊羅其清冉文儔等圖據周家河梗運道二月宜綿乘其未合先爲疑兵于周家河阻其前進而夜襲賊張家觀縱火夾擊遂復東鄉其出援之賊悉奔清溪金栽寺衆

各萬餘據險。適明亮德楞泰新自苗疆至，會剿乘雨宵濟清溪上游，襲潰冷天祿之寨，卽回攻王三槐于金莪。奪其左垣柵，又破徐天德來援賊數千。四月，官兵五路會逼賊巢。王三槐、徐天德等分路突圍，竄入重石坪、香爐坪，尙不下二萬。將與巴州之王家寨、方山坪二賊合。宜綿奏調寧夏西寧兵老回兵各二千，兩廣兵四千赴達州。先遣兵扼二賊合從及回巢之路，而與明亮德楞泰分路進攻。適巴州二賊齊出撲營，百祥問道潛火王家寨。賊回救，官兵夾殲之，並敗達賊之來援者。宜綿以賊德知縣劉清使清詣冉文儔，賊巢諭降，復徧入王、徐。

羅孫各寨。于是王三槐遂至大營。宜綿厚犒之。使回巢諭衆。是夜王三槐率三千人詣壘。詭降將襲營。官軍知其詐。擊破之。而奏言至軍者實非王三槐云。五月達賊聲言南走。而五路犯營。官兵先爲備以待。復大破之。王三槐中槍墜馬。跳免。是月宜綿嗣總統使德楞泰攻重石坪。明亮攻香爐坪。德楞泰攻賊半日。賊木石將盡。奮奪寨門。縱火斃賊二千餘。其香爐坪賊見左寨火起。亦驚潰。圍而火之。無免者。賊乘夜由西面層巒竄逸。兩路追擊。復戮賊二千餘。先後奏殲賊萬餘。六月進圍賊陳家壩。賊傾巢死鬪。不辟銃礮。侍衛西津泰陷陳。賊披靡。

官兵乘勢奮擊鄉勇羅思舉等由山後壓入賊營三路殺賊二千餘賊分二隊竄王三槐徐天德竄而西明亮等追之孫士鳳竄而東德楞泰追之殲孫士鳳于麋子壩并禽各逆家屬孫士鳳者四川教首王三槐等皆其徒也復進圍二賊于徐家山賊乘霧竄追斬數百時徐王二賊僅存二千餘其方山坪賊亦屢爲百祥截其出路舒亮等圍困林亮功于巴州白崖山而觀成劉君輔亦一呼賊數千于九龍池進圍之老木園川賊漸蹙而閏六月惠齡所追襄陽賊數萬分道入川與羣賊響應復猖獗于是遣總兵朱射斗助百祥攻方山坪而明

亮德楞泰皆移軍追襲賊由雲萬東赴湖北時雲陽新起賊方正潮率黨三千入楚賊內而畱其後隊四五千伏陳家山要隘約合擊官兵盡爲鄉勇羅思舉用白旗誘之下山陷伏中一舉殲滅穆克登阿亦破林亮功于萬縣其大寧老木園之賊聞襄賊入川望外援亦日夜突圍會齊王氏卻回湖北惟李全畱川合王三槐八月爲恒瑞惠齡截回通江將赴方山坪羅冉二賊二賊亦屢潛出焚掠巴州通江爲應宜綿令知州劉清率鄉勇萬餘及百祥朱射斗會剿方山坪數路並進使賊不能相顧而劉清募勇由問道遶後山頂壓攻火其寨于是

各隘齊破合擣逆巢賊潰竄巴州與王三槐等合時李全亦同陝宜綿使百祥等扼通江竹峪關防川賊竄陝之路而王徐等賊本無意離川但銳意欲斷川東川北運道以困官軍王三槐先窺巴州江口糧臺劉清使鄉勇羅思舉扼橋斷之而據山與官兵夾攻殺賊八百並走羅冉二賊之來援者逾數日賊復合犯巴州據對河盡斷援兵州惟土垣外環木柵兵民退保州治後山賊遂據巴州欲從儀隴南部分犯保寧達州奪運道總督英善馳赴廣元賊不敢向保寧遂合隊犯營山徧嘉陵江川西戒嚴宜綿使劉清以鄉勇扼江口防其回達州

之路。檄百祥等破賊營山。與鄉勇夾擊。三晝夜。殺賊二千餘。會保寧兵亦迎擊。而前賊退屯營山之黃渡河。爲巴達渠水路要地。與官兵相持不退。而旁掠儀隴渠縣。虜脅日衆。而利川復有新起。掠萬縣之賊。官渡口有欲掠糧臺之賊。奉節有新起。應白崖山之賊。宜綿奏言。近日惠齡恒瑞明亮德楞泰諸將皆入陝。惟臣一人在川。各賊齊擾川東北運道。嘉陵江防孔亟。欲赴保寧。則川東千里無人調度。請別簡大臣總督地方而已。親督師。專一辦賊。詔勒保赴川代宜綿總統軍務。宜綿督四川兼理軍需。宜綿又言賊起以來。徵調官兵四川調

至一萬九千有奇。陝甘合調二萬有奇。湖北湖南更無餘兵可調。雖奉旨令各省補募。止資彈壓。難備攻

剿。而州縣團練鄉勇。各衛村莊。尤難責其長驅赴敵。目前賊勢如明亮。德楞泰統兵襄陽。則鄖賊竄入興安。宜昌賊折回夔巫。况雲陽奉節。新起伏莽之賊。尙多。兵力日分日薄。乞

敕令各省于新兵外添練備戰之兵。

四川陝甘各萬。湖北河南各五千。一月召募。兩月訓練。至目前隨營鄉勇。日支口糧。費與兵等。究非紀律之師。卽有畏縮不前。難遽繩以軍法。不若選充行伍。其技藝不拘矢銃刀矛。賊平卽補營額。則經費不虛糜而驍悍

游手有所約束

詔行之十一月王徐羅冉四賊復

分屯二地宜綿使劉清領鄉勇專攻羅冉斷其援羅冉
二賊走巴州援白崖山賊白崖山賊林亮功急突圍連
日與舒亮穆克登阿等鏖戰王三槐復分攻大竹廣安
州鄰水以援之保興朱射斗等倍道援鄰水得不陷賊
卽乘間分隊突陷長壽長壽水陸咽喉上通合州下連
重慶爲川東門戶會勒保抵瀘州以新調貴州兵未至
先檄總兵百祥由合州回守重慶而羅冉二賊乘官兵
東去益分掠儀隴營山梗運道十二月襄陽賊復由陝
逼川北宜綿奏言楚賊飄忽無常往反數千里最慄悍

而大兵數路追壓聲勢甚壯必可聚而殲旃惟四川之賊川東則夔州重慶達州忠州川北則順慶保寧臣所有之兵東馳西擊日不暇給已咨恒瑞等由陝入川北夾攻羅冉二賊先通運道俟勒保率黔兵由重慶會剿是月恒瑞破王廷詔于保寧解營山岡而涪州大竹鄰水各圍勇拒賊王三槐復回達州其奉節之鐵瓦寺賊亦圍三總兵于開縣之回龍場城中兵勇馳救乃解故宜綿急咨福寧額勒登保入川初額勒登保之自苗疆至湖北也福寧已與長陽賊黃柏山賊相持數月未偏賊巢三月額勒登保至軍卽連克險要深入三十餘里

賊棄寨遁入鶴峯州之芭葉山。四月復連奪賊柵，直抵巢穴。賊守險死拒，官兵層層立柵，漸逼入隘。猱攀蟻傅，晝夜攻逼，賊于六月夜突總兵諸神保營柵而出，追敗之。建始縣賊欲山施南巴東合川賊爲官兵所扼，探知長樂之白魚寨有鄉勇守卡，僞冒官兵入，奪據之。額勒登保乘其守備未固，急攻拔諸柵，三路逼巢，斬賊二千餘。賊復由亂箐逃上冒子山，削壁仄磴，繩梯互引，險不可前。而賊糧未盡，伏兵誘之不出。七月復進攻，愈上愈陡。木石雨下，俟其漸少，進逼寨。賊復乘霧絕厓遁，額勒登保遣兵分守黃柏山、四方臺、滋邱、榔梓諸山，防其竄。

入而自追賊復斬戮二千惟首逆竄逸屢奉

旨切

責九月賊謀往巴東渡江赴宜昌鄭巫諸山連日追殪
二千斬首逆林之華于巫山惟餘覃加耀竄施南山內
屢禽斬尙存賊二千餘十一月復竄長樂之朱里寨周
五十里三面懸崖惟東南一徑與兩嶺相連其外懸崖
二堦螺旋鳥道賊皆嚴守十二月額勒登保佯徹二堦
兵不攻賊果悉銳守兩嶺乃潛遣死士數十縋登二堦
掘地通賊卡窖火藥轟之而各路伏兵同時進攻賊爭
斫柵奪路不知柵外懸崖數十丈後擠前踣勢如瀉瀑
百無一生坑谷皆滿惟覃加耀二百賊縋崖遁額勒登

保乃令福寧及總兵富森布先領川兵回夔州而自率將士分路追賊旋殲覃加耀于終報塞

詔責額勒

登保兵多賊少持久一年有過無功奪侯爵及領侍衛內大臣褫雙眼花翎福寧革總督太子少保及孔雀翎均降副都統馳赴四川額勒登保奏西湖北官兵分屯宜昌鄖陽而自將兩廣兵二千赴鄖西與明亮等夾剿此嘉慶二年惠齡宜綿相繼總統時三路兵形賊勢也

嘉慶川湖陝靖寇記三

三年正月

詔勒保以總統兼督四川宜綿移督陝

甘英善福寧會理四川軍餉而景安總督湖廣時襄賊復渡漢中全陝震動高均德掠城固洋縣連日虜脅衆復萬餘明亮德楞泰冒雪敗賊洋縣禽斬二千餘散其脅從千四百賊潰遁五郎爲鄉勇所遏東趨鎮安德楞泰馳赴米糧川扼其赴山陽之路與明亮夾擊于鎮安洵陽先後俘馘賊僅餘二三千而後隊齊王氏等復將偏漢柯藩嚴防漢北二月齊王氏馬步二萬由西鄉營洋縣先遣前隊分路涉漢以牽官兵而大隊由上游潛

渡漢北分二千賊助高均德使東致大兵而自與李全
干廷詔等乘虛分趨北棧高均德果日夜引大兵長驅
東北明亮等馳扼兩河關口與額勒登保合敗賊鎮安
復邀擊于商州而齊王氏李全等已分二道由城固洋
縣老林踰山北出寶雞岐山復合攻郿縣掠整屋將直
犯西安秦承恩回防省城總兵王文雄以兵勇三千拒
之賊分十餘隊馬步相間圍攻官軍王文雄爲圓陣四
向銃礮外列矛矢佐之賊驍騎千餘衝陣急揮藤牌兵
踴躍而出賊騎反蹂乘勢奮擊追北復敗其林中伏賊
先後俘斬二千賊始不敢窺西安時柯藩革職詔

進王文雄提督陝西

上以明亮德楞泰擁勁旅剿

烏合賊。老師糜餉。無方略。致賊日橫行。而每奏皆德楞泰先驅。明亮後繼。是明亮罪尤重。

詔革職逮問。旋

降爲領隊大臣。與柯藩等戴罪留軍。

命宜綿赴軍

督戰。三月宜綿奏言。臣奉

命移督陝甘。自顧衰病。

難以衝鋒。惟于各路忠勇大將。推誠策厲。臣聞額勒登保。自剿楚賊。以至入陝。身先士卒。奮不顧身。實諸將之巨擘。德楞泰熟練軍務。策畫精明。拊循士卒。人皆用命。明亮屢經行陣。地利賊情。無不洞悉。惟閱歷既深。或過持重。且德楞泰年力較壯。聞賊卽行。明亮自當隨後策

應當此用兵孔急。正當驅策羣力，以期迅奏膚功。時明亮德楞泰破姚齊二賊于山陽之石河。又與賽沖阿夾擊于鄖西界之甘溝，連殪數千。又鄖西鄉勇扼其前，不能東竄。我兵敷路偏賊三岔河，賊尙餘八九千，分據左右山。欲突出溝口，我軍探知姚齊首逆皆營左山，盡銳圍攻。賊無走路，盡殲之。齊王氏姚之富隕崖死，傳首三省。捷聞。上以明亮等剿賊久，且未生禽首逆，不爲大功。各賞賚有差。四月，額勒登保邀李全于藍田，連破之。各峪賊復與高均德阮正隆合屯五郎鎮。安山陽間，將分犯楚豫。諸將以賊勢盡趨東北，乃議明亮以兵二

千赴宜綿于興安遇其東王文雄由郿縣蓋屋各峪扼其北而額勒登保德楞泰率大兵壓其西南明亮遇高均德于商雒交界之軍嶺川與額勒登保德楞泰夾擊賊奔老林官軍分道邀之雒南賊聲言欲爲齊王氏姚之富報讎鏖戰兩全河衝突再四破斬賊二千四百餘生禽三百餘高均德敗竄秦嶺賊晝夜西奔五郎復會李全張天倫二賊官軍敗之大仁河斬七百餘時川賊阮正隆復與陝賊分隊思還川北由漢陰石泉南窺漢江興肇柯藩等擊其半渡賊且戰且濟明亮等殲其後隊二千于石泉其已渡之前隊二千竄通江南江咨勒

保剿之其襄賊高均德李全自漢陰東走額勒登保移軍湖北五月德楞泰等破高張李三賊于兩河關賊折回五郎洋縣時三賊皆楚豫之人欲引官兵西追而乘間東遁其所脅從川陝之衆皆不願東聞官軍招撫先後投出二千餘賊尙萬人官軍連破之茅坪褒城賊分二隊綴官兵一北出鳳縣掠兩當爲甘肅兵所却遇明亮軍殲諸略陽一東奔武關三首逆皆在焉官軍邀其渡河之路復折奔寧羗巴山將入川張天倫渡河溺死德楞泰步騎七千餘馳赴廣元邀斬千賊于南江賊赴羅丹二賊于儀隴德楞泰急約惠齡恆瑞夾擊復斬千

賊其前渡漢江之阮正隆張正潮龍紹周等亦由巴州至惠齡等迎破之于雙路場時陝楚各賊自失姚齊兩渠魁又不能還楚欲倚川賊爲聲勢俱會于冉文儔營不下二萬其三月間由雲萬大寧竄楚之賊張漢潮劉成棟等衆萬餘掠巫山歸州偏遠安南漳額勒登保由漢陰水陸東下四月與景安會剿張漢潮等于南漳斬獲千賊走穀城官兵四路蹙之斬戮漂溺五千餘生禽九百餘餘賊遁鄖陽時明亮旣殲略陽西鄉各賊五月卽馳赴平利與額勒登保剿楚賊于鎮坪賊棄驛馬婦女由老林奔太平官兵分追入川詔以陝楚各賊

均·偪·入·川·而·四·川·滿·漢·官·兵·不·下·五·萬·勒·保·宜·會·同·諸·
將·齊·心·蹙·賊·毋·致·竄·逸·其·令·額·勒·登·保·明·亮·專·剿·張·漢·
潮·等·爲·一·路·德·楞·泰·專·剿·高·均·德·李·全·阮·正·隆·并·會·同·
惠·齡·等·夾·剿·羅·冉·爲·一·路·勒·保·專·剿·王·三·槐·徐·天·德·及·
雲·萬·諸·賊·爲·一·路·而·宜·綿·專·防·由·川·竄·陝·之·賊·景·安·專·
防·由·川·竄·楚·之·賊·各·專·責·成·互·相·援·應·毋·東·馳·西·擊·各·
不·相·顧·惠·齡·等·迎·擊·陝·賊·于·儀·隴·適·羅·其·清·下·山·來·援·
我·伏·兵·斷·其·還·巢·之·路·賊·敗·就·冉·文·儔·營·合·據·大·神·山·
與·各·陝·賊·連·營·數·十·里·六·月·德·楞·泰·惠·齡·等·遣·兵·扼·山·
後·渠·河·防·其·北·竄·而·合·兵·圍·攻·大·神·山·連·破·賊·卡·殺·賊·

二千又撤營佯退誘之破其追襲之賊千餘賊屯踞死
守七月官兵三路搗巢復截其潛度渠河之賊賊走就
羅其清于箕山德楞泰率索倫勁騎追之黃渡河與惠
齡等夾擊斬溺四千餘賊奔箕山三十里之龍鳳坪諸
賊各據一寨相犄角約三萬時羅冉二賊有隙惠齡遣
人諭羅其清縛獻冉文儔自贖不應八月德楞泰伏兵
誘箕山賊下山方擊斬二千而楚賊高均德龍紹周徐
萬富唐大信龔建等卽乘間北走廣元其富成所追之
徐天德樊人傑王登廷等亦由營山與楚賊合兵趨陝
德楞泰等復舍羅冉二賊分路追截四晝夜斬獲四五

千羣賊復偪回箕山而羅其清乘官兵北追亦已分賊五六千攻營山縣徐天德亦扼渠縣餉道與羅其清犄角官兵先後擊敗之餘賊盡奔箕山德楞泰等遣鄉勇嚴防各隘而約諸軍會剿明亮亦以兵三千剿張漢潮等于通江之北先後斬戮數千賊不能渡漢初羣賊之還儀隴也惟李全高均德留廣元欲自陝還楚九月額勒登保追李全高均德等亦自北而至適德楞泰已盡破箕山之賊羅其清棄巢北竄與李全王廷詔等盡奔大鵬寨寨天險廣百餘里額勒登保德楞泰惠齡恆瑞四路進攻羅其清先遣其黨分劫巴渠運道徐天德冉

文儔亦分擾大竹梁山爲外應。諸將分兵剿之。嚴扼其輸糧入寨之賊。十月四面梯攻。縱火焚寨。斬墜死者五千餘。羅其清率走青觀山。額勒登保鑒前黃柏山芭葉山之轍。不俟兵齊。乘賊未守備。卽倉卒急攻。直逼巢穴。身先士卒。冒矢石。死者死。生者生。晝夜轟擊。賊不能支。十一月克之。復追擊于巴河。于虛空寨。寨無糧。無水。大軍合圍。數重。勢在必克。額勒登保德楞泰忽下令開圍。一面賊初更潰遁。我軍不追。黎明馳進。未及三十里。及之。則賊萬衆。黑夜已潰竄過半。逐北至方山坪。解散殆盡。生獲羅其清于石洞。其逸黨盡爲遠近寨民三日禽。

獻乃議恒瑞赴陝富成赴大竹額勒登保移剿合州諸賊十二月除夕德楞泰惠齡等襲破冉文儔于通江斬三千餘賊又殲其突圍賊二千斬冉文儔詔賞德

勒泰惠齡輕車都尉諸將士賞賚有差川北兩巨賊皆平其川東之王三槐冷天祿則勒保專剿之初四川軍餉川北由潼川順慶運達州川東由重慶夔州運梁山自賊王三槐擾梁山斷官軍餉道轉攻開縣以援白崖山鐵瓦寺二賊于時白崖山缺餉兩月鄉勇四散賊林亮功遂傾巢突出與王三槐合營圍開縣水陸並進勢張甚侍衛烏什哈達戰死詔褫舒亮穆克登阿職

留軍効力勒保旣受

命總統正月先殲萬縣新起

之賊遂由梁山進剿以開縣界新寧東鄉間先使提督
富成馳赴新寧夾擊王三槐賊復會羅冉二賊于東鄉
勒保繞出其前與富成夾擊破之時白號賊王三槐冷
天祿踞東鄉之前河與青號徐天德黃號樊人傑及藍
號新附各寨連營開縣之臨江市最強而羅其清冉文
儔亦合踞東鄉之後河皆太平通江入陝之路將三路
犯陝勒保使楊秀守太平恒瑞等扼通江保興繞出賊
前夾擊破賊于固軍壩奏殺賊二千請獎厲將士
詔以勒保所殺皆脅從無首逆且軍中積習于官兵陣

亡則以多報少而殺賊則以少報多乃濫乞恩賞其切
戒之又 詔以四川知縣劉清得民心將鄉勇禦賊

賊以其廉吏望風引避其據實保奏王三槐犯陝不遂
復合通巴之賊犯達州勒保督諸將邀擊巴河而白崖
賊林亮功等復折回開縣分擾雲萬大寧奉節勒保奏
催湖南苗疆兵雲貴各五千赴川三月觀成劉君輔殲
陳崇德于老木園 詔以其老師逾年各降爲總兵
五月勒保檄觀成舒亮等截擊林亮功于梁萬間先後
殲賊五千林亮功槍斃餘賊二三千遁回東鄉安樂坪
與王三槐合其徐天德王光祖等出沒太平開縣屢與

官軍相持

詔切責勒保老師養賊七月勒保以三

槐曾隨劉清至宜綿營乃復令前隨劉清至賊寨之貢
生劉星渠往說之三槐故狡譎反覆持兩端恃前此出
入軍中無忌乃留星渠爲質而自詣大軍勒保遂以生
禽首逆奏時值

上奉

太上皇帝駐蹕木蘭山

莊各蒙古王公祝釐瞻覲乃下

詔晉封勒保一等

威勤公並晉軍機大臣大學士和珅公爵福長安侯爵
將士賞賚有差復釋勒保弟永保于刑部獄而三槐黨
冷天祿仍據安樂坪久塞中鹽糧將盡冷天祿詭請降復
月勒保圍安樂坪久塞中鹽糧將盡冷天祿詭請降復

夜突營而林亮功餘黨王光祖包正洪蕭占國張長庚等復蹂躪江北涪忠諸地徐天德亦屢犯大竹隣水

詔責勒保擁大兵攻糧盡援絕之賊曠日持久前禽首逆之效安在其楚賊出沒川陝間者明亮以七月後剿張漢潮等于通江于南鄭殲賊數千斬賊首李槐詹世爵賊不得渡漢復奔川東將由界嶺還湖北明亮由夔登舟先至巴東伏兵界嶺殲其前隊張漢潮復西遁太平大寧山箐踰漢江走鎮安洵陽商雒思還楚豫其樊人傑龍紹周五千餘李樹龔建唐大信萬二千餘阮正通等七千餘十月內復與川賊分黨先後由城固西

鄉犯陝宜綿檄王文雄禦其西。總兵慶溥禦其東。是年五月戶部侍郎蔣賜棨奏連年征剿。種苗教匪。撥帑八千餘萬。請暫開捐例。以資儲備。詔大學士九卿科道議奏。仿乾隆川運例。權宜舉行。至明年乃止。謂之川楚善後例。此嘉慶三年勒保繼宜綿總統羣賊會于四川之形勢也。四年正月三日壬戌。大上皇帝賓天。越四日癸亥。上命軍機大臣傳諭四川湖北陝西將帥督撫曰。我皇考臨御六十年。四征不庭。凡窮荒絕徼。無不指日奏凱。至內地亂民。如王倫田五等。偶作不靖。旬日立殄。從未有勞師數年。糜餉數千萬。尙未

藏事者自末年用兵以來

皇考宵旰焦勞大漸之

前猶以望捷成什迨至彌留親執朕手頻望西南似有遺憾若教匪一日不平朕卽一日負不孝之疚內而軍機大臣外而領兵諸將同爲不忠之臣邇年

皇考

春秋日高事從寬厚卽如貽誤軍事之永保嚴交刑部治罪仍旋邀寬宥其實各路縱賊何止永保一人奏報粉飾拚敗爲功其在京諸達侍衛章京無不營求赴軍其歸自軍中者無不營置田產頓成殷富故將吏日以玩兵養寇爲事其宣諭各路領兵大小諸臣戮力同心刻期滅賊有仍欺玩者朕惟以軍法從事越七日丙寅

大學士襄勤公和珅有罪罷免下刑部獄 詔以和

珅壓閣軍報欺罔擅專致各路領兵大臣恃有和珅蒙庇虛冒功級坐糜軍餉多不以實入奏姑念更易將帥一時乏人勒保仍以總統授爲經略大臣其川陝湖北河南督撫及領兵各大將咸受節制以一事權明亮額勒登保均以副都統授爲參贊大臣別領官軍各當一路有不遵軍令者指名參奏初教匪起事皆以官偏民反爲詞及王三槐禽解至京 命軍機大臣審訊亦有此供 上聞之惻然命暫緩行刑 詔曰國家深仁厚澤百餘年百姓生長太平使非迫于萬不得已

安肯不顧身家。鋌而走險。皆由州縣官吏。賒小民以奉
上司。而上司以餽結和珅。今大憝已去。綱紀肅清。下情
無不上達。自當大法小廉。不致復爲民累。惟是教匪迫
脅良民。及遇官兵。又驅爲前行。以膺鋒鏑。甚至剪髮刺
面。以防其逃遁。小民進退皆死。朕日夜痛之。自古惟聞
用兵于敵國。不聞用兵于吾民。其宣諭各路賊中被脅
之人。有能縛獻賊首者。不惟宥罪。並可邀恩。否則臨陣
投出。或自行逃散。亦必釋回鄉里。俾安生業。百姓困極
思安。勞久思息。諒必一見恩旨。翕然來歸。其王三
槐所供川省良吏。自劉清外。尙有知巴縣趙華。知渠縣

吳桂其量子優擢以從民望至達州知州戴如煌老病
貧劣胥役五千人借查邪教爲名徧拘富戶勒索而首
逆徐天德王學禮等反皆賄縱民怨沸騰及武昌府同
知常丹葵奉檄查緝株連無辜數千嚴刑慘酷致品傑
人拒捕起事實爲罪魁其逮京治罪難民無田廬可歸
者勒保卽督同劉清熟籌安置如何資送還農如何編
丁占籍或仿明項忠原傑招撫荆襄流民之法相度經
理並先徧諭川陝楚豫地方使咸知朕意又詔曰
川楚軍需三載經費至逾七千餘萬爲從來所未有皆
由諸臣內恃和珅護庇外踵福康安和琳積習在軍惟

酒肉笙歌自娛以國家賦帑供其浮冒今自親政以來一切賞罰斷自朕衷臣下多不預聞尙復何所營求觀望且聞各路官兵鄉勇之餉多遲延不發致令枵腹從事披褐無裨牛皮裹足跣行山谷而領兵大員則任意支用不敢過問此弊始于畢沅在湖北而宜綿英善在川相沿爲例今勒保任經略福寧理糧餉其嚴行察核上命軍機大臣訊羅其清供稱惠齡一軍較弱責其爲賊所輕令回京守制又命軍機大臣核宜綿前後奏報皆屯駐無賊之處從未與賊交鋒且已老病令解任來京又以上年賊偪西安焚掠秦承恩反回入

省城不卽督兵剿賊。且官聲平常。交刑部治罪。又以景安本和珅族孫。平日趨奉阿附。每于奏事之便。稟承指使。恃爲奧援。剿堵皆不盡力。駐軍南陽。任楚賊犯豫。直出武關。惟尾追不迎截。致有迎送伯之號。甚至居民裹糧請軍。拒而不納。武員跪求擊賊。不發一兵。爲參將廣福面請。反挾憤誣劾。其獲封伯爵。亦攘道員完顏岱捕浙川邪教功。張皇入奏。特逮下獄。擬重辟。而以倭什布總督湖廣。吳熊光巡撫河南。又詔以前年襄陽賊犯孝感時。獨隨州未被焚掠。由居民村莊預掘溝濠。疊土山。嚴守禦。賊無所施其技。旋爲官兵追躡擊敗。此保

障民生良策若川陝河南仿行何至任賊蹂躪其令勒保會同各督撫曉諭州縣居民扼要團練使賊無可虜掠與官軍犄角于是始議堅壁清野之策勒保用合州知州龔景瀚議首行于川東川北既而那彥成松筠台布長麟行之于陝甘又後書麟吳熊光行之于湖北先後三四載堡寨告成而賊亦以次銷滅由上年明亮德楞泰發其端而詔書申救行之云上又以軍

營惡習每臨陣輒令鄉勇居前綠營兵次之滿兵吉林索倫又次之而賊營亦先驅難民抗我顏行其真賊邪匪皆在後觀望先奔是日令鄉勇與難民交鋒何異自

相屠戮在諸將之意以鄉勇傷亡無庸注冊報部並可
擄收爲功至京師禁旅傷亡必當具奏更非如弁兵止
須咨部之比是以不令前敵及戰勝則又攘以爲功而
衝鋒陷陳之鄉勇反不得與是以屢次保奏皆滿兵居
多綠營兵間有之而鄉勇保奏則至爲寥寥其何以作
士氣而肅戎行況徵調黑龍江兵往反數千里供億浩
繁不習水土不熟賊情計調黑龍江一兵可募數十鄉
勇而生長其地自衛身家亦可免流爲匪嗣後鄉勇有
功一例保奏陣亡一例議卹以收敵愾同仇之效又
詔曰教匪奔竄數省嘯聚十餘萬大半附和脅從斷

無邪教如此之衆蓋從教之與從逆情罪輕重殊科其
邪教本律除倡首傳徒之犯例應斬決外餘止遞減流
徒至焚香奉佛持齋誦經尤律所不禁乃州縣吏藉查
教匪爲利藪任胥役之詐嚇以一人累多人以一案牽
多案公差四出暮夜捕人幾與查辦叛逆無異而正犯
反得賄縱潛逃藉詞激變抗拒不已繼以焚掠焚掠不
已繼以虜脅虜脅日衆黨與日多因而抗兵戕官從前
臺灣林爽文此次達州王三槐等初皆不過一邪教杖
流可結之案竟至勞師糜餉數省沸騰自後查辦邪教
止案本律治罪其投出難民回籍後不得動以川楚邪

黨妄行處治至各賊首逆亦不過往來掠食並無僭號據城之事若能悔罪投誠原不咎其既往如臺灣莊錫舍湖南降苗吳隴登及閩洋投首海盜皆蒙賞翎頂爲官出力赤子盜弄朕兵于潢池中耳其令督撫宣示朕意是年正月勒保奏言臣受任經略先籌川省大局應督率額勒登保德楞泰等合剿徐天德冷天祿二賊爲正兵而以七十五觀成所剿之夔州賊富成所剿之保寧賊兩路爲偏師賊勢旣重在四川臣應駐梁山太竹適中之地調度督率並檄明亮一路先殄滅張漢潮以次肅清陝境免其東竄楚豫時勒保攻破安樂坪追擊

冷天祿于開縣復與額勒登保夾攻徐天德王光祖于新寧先後殺賊二千徐天德走墊江冷天祿走忠州額勒登保等分追而勒保由梁山中路進攻王光祖並檄德楞泰惠齡由達州要擊渠縣廣安之賊偪赴梁山與諸軍會剿二月官軍屢挫徐冷二賊于涪州長壽大竹徐天德竄達州冷天祿竄鄰水德楞泰追徐天德破之于開縣賊東走夔州將與王光祖卜三聘等合走湖北官軍要之折赴太平與李樹龍紹周唐大信等合復爲官軍擊散由雞鳴寺渡河水漲漂沒賊僅千餘額勒登保追冷天祿以病留大竹遣劉君輔追擊定達而總兵

楊遇春百祥等分擊包正洪于文蟲溪適額勒登保病
愈復馳至軍而閩中折回之蕭占國張長庚二賊衆五
千復至營山將撓官軍後路乃回軍迎擊殺賊二千餘
令朱射斗遠截其後四扼險要賊全隊偪上譚家山山
後絕壁無走路乘夜蹙攻短兵格殺隕崖死者二千餘
生禽數千斬二首逆兩路賊殲焉

詔封二等男額

勒登保進剿冷包二賊適包正洪已與儀隴賊張子聰
合竄隣水乃冒雨突擊冷天祿于岳池冷天祿狃于安
樂坪之役藐視官軍令大隊先行惟自留八百人殿後
楊遇春穆克登布以勁騎二千至一戰殲之又進追其

大隊于石筍河五舟迭渡，僅濟千賊，餘數千賊方臨岸爭舟。我都司楊芳以九騎越山先至，卽麾幟大呼馳擊。賊隔山不知我後隊虛實，爭赴河，陷淖溺淺者三千餘。其五舟離岸，賊蟻附甚重，每舟百人，一矢覆一舟。五舟五舟齊覆，隔河賊號呼不能相救。俄大軍至，騎浮而濟，并追殲其先渡之賊。詔以額勒登保病新愈，卽轉戰直前，旬日殲三賊，不愧大將視諸將，但獲渠魁不淨餘匪，致一賊滅一賊復起者功尤偉。晉封一等男，所領官兵普賞一月錢糧。四月，額勒登保遣朱射斗追包正洪，而自移剿張子聰于梁山。忠萬雲陽連破賊，忽大寧。

賊卜三聘等西鄉賊樊人傑龔建等分路來援額勒登保及楊遇春分禦之連日冒雨山戰而德楞泰所追之徐天德復至于是三路兵皆會而朱射斗所追之包正洪又與夔州高郝二賊合川東羣盜皆聚開縣東鄉間官兵三面會攻羣賊議復北竄川陝老林乃使張子聰潛刼江口糧餉額勒登保回軍擊之卜三聘卽乘間奔大寧七十五追之德楞泰所追賊亦分爲二徐天德龔建竄大寧太平山箐樊人傑龍紹周唐大信張天倫等赴陝五月德楞泰贏糧倍道要之乃分兵勇六千使賽冲阿擊賊大寧而自以六千擊樊龍唐張等賊于安康

紫陽連日斬獲復驅入川東時朱射斗斬包正洪于茅坪七月德楞泰由奉節進剿巫山大寧各賊與賽冲阿朱射斗夾擊禽斬千百又五路邀賊于房竹賊竄入川德楞泰復分朱射斗追張天倫于巴東而自剿李樹徐天德于房竹殲龔建于竹谿其額勒登保一路六月追張子聰于通江冉天元王登廷攻官軍後路擾運道擊之劉家河斬溺千餘復追入東鄉大竹鄰水長壽王登廷復分二路一向大竹渠縣以牽官兵而自率大隊趨陝與齊家營合火光三十里勢猖獗額勒登保破之通江殲賊二千生禽千餘復追入川勒保奏健銳火器兩

營京兵不習勞苦不受約束征剿多不得力距達州七
十里之地行二日方至與其久留糜餉轉爲綠營輕視
請全撤回京無庸續調其川北賊在廣元寧羌間者恆
瑞檄甘肅兵防其西將軍富成由略陽遏其北三月賊
西寇階州布政使廣厚總兵吉蘭泰禦之賊分二路各
六千一白號楊開甲向宕昌富成追之一藍號張士龍
向良恭何廣厚等禦之于新市鎮禽斬千餘獲馬騾器
械無算賊奔寧遠犯鞏昌我兵間道趨通渭殲其後隊
賊東走秦州而富成以兵七千追宕昌一路久不奏報
有詔切責適四月富成所追白號賊亦至秦州分

屯渭河南北廣厚等多張幟渭南爲疑兵而精兵二千
馳揜渭北之賊賊驚潰脅從逃散者二千餘賊亂渭而
渡漲溺及陷淖者千餘渭南賊亦望風東遁由陽平關
將入川恆瑞邀之復走成縣適廣厚等追禮縣藍號賊
至冒雨突襲白號賊禽斬七百又與老回兵夾攻于徽
縣又追截之白水江各斬賊數百五月白號賊冒死奪
渡白水江由略陽奔川北其富成所追藍號賊往來階
文山箐復欲渡白水江恆瑞與廣厚等夾攻賊敗渡嘉
陵江走略陽追及白號賊合奔川北其前隊爲額勒登
保大軍所殲

詔以嘉陵白水二江爲川西門戶令

勒保撥兵嚴守。又以富成擁兵七千專剿藍白二賊。徒尾追不迎擊。任蹂躪秦隴。褫職逮問。旋留軍効力。時陝賊張士龍在棧道西。張漢潮在棧道東。而張天倫由平利竹谿犯湖北。是爲陝西三張賊。張漢潮自正月爲明亮截擊商雒間。不獲東竄。由五郎奔徽鳳。明亮與甘肅兵邀擊。二月賊復折回秦嶺。將由藍田商州分數路竄河南。三月明亮奏言。臣自去秋至今。日夜追賊往反五省。所領兵三千。除落後留養外。僅存千餘。堵剿不能兼顧。而終南萬山叢複。東西千餘里。有山匪爲賊嚮導。專與官兵相避。必需有夾攻堵截之兵。而陝楚各兵又須

分剿二張逆未能分顧協剿是以奔馳半載未能殄滅
時永保代秦承恩撫陝西勒保令領陝甘兵二千與明
亮協剿又詔慶成以直隸兵千餘赴之五月賊爲
明亮兵所迫西奔秦州遇恆瑞軍折回東北明亮邀賊
商州復驅而西與總兵關騰夾擊于五郎六月賊由子
午谷越秦嶺以恆瑞慶成永保分扼北棧復趨商州趨
山陽將走二郎皆爲明亮邀擊賊復西竄詔責慶
成永保不夾擊八月張漢潮分數路自鎮安分竄山陽
漢陰以牽我兵而大隊北趨藍田各峪均爲官兵所扼
永保自三月華陽失利後氣已餒不敢迎擊大隊乃以

分堵餘匪爲名軍孝義廳截其北而慶成由五郎西追恆瑞亦破川北藍號賊馳赴石泉與富成等迎剿鎮安分隊之賊明亮敗張漢潮于五郎之廟溝奏言臣受

命參贊節制陝西一路前奏定與承保慶成三面偪圍乃承保邀慶成爲一路藉堵小匪並將遣追大隊之富成馬兆瑞等調往他所臣自郎至商又至鎮安往來奔馳從未與承保慶成富成三路之兵相值而東竄賊兩日行三百餘里并無追師時松筠代宜綿督陝甘駐漢中上命松筠察三人功罪松筠奏言近日恆瑞慶成已馳赴明亮軍承保前在鎮安移營一旬不出鎮

安境內其後久屯孝義廳之大山岔兩旬有餘惟以防
守北面爲言無謀無勇惟知利已歸過于人不但將兵
非所長而地方百姓亦不能休養明亮老將惟精力已
憊追賊不能神速慶成尙能擊賊償事之罪永保爲上
明亮慶成次之

上疏逮永保其張天倫賊七千四

月由平利窺竹谿欲還湖北而高均德馬得貴亦由太
平紫陽趨平利犯楚總督倭什布檄兵勇守各隘參將
董寧川力戰死之賊折回陝

詔永保東赴鎮安與

倭什布夾擊時川東賊皆楚人爲川兵剿急復思還楚
張天倫先突入竹谿李樹高均德樊人傑龔建等繼之

十數路更番迭犯欲牽綴官兵而大隊乘間突竄倭什布力禦房竹之界並嚴防漢江

詔調山西兵三千

赴湖北六月福寧奏言賊以脅從而日增兵以分防而見少據川東北各府廳州縣稟報多者萬餘少者數千其不知首逆姓名者尙不知凡幾新起之賊實多於剿除之數地方之傷殘更甚黎庶之疾苦更深賊愈剿而愈熾餉徒糜而罔益不敢壅于上聞乞特申

乾斷早決大計七月

詔曰勒保經略半載莫展一

籌惟彙報各路情形按旬入告近據倭什布奏川賊接踵入楚不下二萬有北趨荆襄之勢並無追剿之師又

藍白二賊由秦隴折回川北亦未聞遣堵截之師是勒保竟擇一無賊之處駐營株守罪一且屢奏均言不必增兵而附奏又請撥餉五百萬若迫不及待自相矛盾意圖浮冒罪二各路奏報多王三槐餘黨勒保止將首逆誘禽而置餘匪于不問罪三軍營保奏大半親隨之人而兵勇錢糧并不按期給發以致枵腹跣行凍餒山谷幾同乞丐士馬何由飽騰罪四勒保上負兩朝委任之恩下貽烝民倒懸之苦其卽令尙書魁倫副都御史廣興赴川逮問治罪其經略事務以明亮代之魁倫署理四川總督廣興留理達州軍餉

上以楚事方急

詔明亮額勒登保各移軍赴剿會倭什布破賊南
漳德楞泰復分兵令朱射斗七十五剿川賊而白以步
騎六千進軍房縣乃

詔川陝大軍毋赴楚初福寧

奏言川陝轉運軍需煩難萬狀諸將中惟額勒登保一
人能知大體遇餉運偶缺卽自行籌辦從無藉口餘皆
不問輓運之難易惟歸咎于糧餉之不充明亮德楞泰
皆所不免勒保亦奏言欲增兵必先籌將目前諸將惟
額勒登保最得兵心非惟久從征戰者不見其疲卽疲
兵歸其營亦成勁旅以此士皆用命賊皆畏憚雖以明
亮之久歷戎行尙所不及

詔以額勒登保奮勇忠

蓋戒飭諸將及是更易經略

上念無逾額勒登保

者特以其不識漢文于軍書旁午不宜而明亮在金川
苗疆久歷行陣用代勒保意蓋未嫌也旋以明亮剿張
漢潮遲延又與永保互訐奏均免職卒以額勒登保代
之此嘉慶四年秋以前勒保由總統任經略時
上
初親政更新號令之事也

嘉慶川湖陝靖寇記四

四年八月詔曰自用兵以來各路將帥惟額勒登保英
勇超倫身先士卒屢殲林之華軍加耀羅其清蕭占國
張長庚冷天祿等厥功甚偉民間聞其軍過知其能愛
百姓無不安堵歡迎卽如胡齊崙一案督撫將帥無不
受其餽遺獨額勒登保一人無之忠勇公清實東三省
人傑不惟諸軍悅服卽在京滿漢臣工無不重其爲人
其授爲經略大臣補授正白旗漢軍都統魁倫卽將經
略印信及前賞賞明亮荷包轉交額勒登保祇領又
命軍機大臣工部尚書那彥成佩欽差大臣關防率

盛京吉林兵三千赴陝西軍與明亮辦賊又以知州劉清前至王三槐各營招撫數次賊因其良吏皆不加害特賞加兵備道銜隨同魁倫辦達州軍餉先是景安劾湖北襄陽道胡齊嵩冒功侵餉逮交刑部審訊自服于嘉慶二年同總兵馬瑜誣殺夾河洲難民二百餘詭稱教匪冒功伏法而倭什布籍沒胡齊嵩得其支放軍需薄餽送提用動以萬計畢沅永保數尤多詔各籍

其家革畢沅子孫官職并命魁倫廣興嚴核四川

軍需虛實又以軍需倉庫自倉庫而勒保奏請采買倉穀二百萬石以部餉軍需與川省錢糧混同影

射國家剿寇安民之資豈爲外省補虧空支俸餉之地其核實以聞松筠奏言敎匪起于湖北其時督臣畢沅皆沿苗疆時供億揮霍自後官軍入陝入川相沿成例自 皇上親政以來整飭戎行諸臣始凜法搏節縱有貪利之人已乏罔利之術惟是軍需冒銷總在款目輾葛請令各路糧臺按旬開報按月彙奏不惟案牘易清而訪查亦易得實 詔行之又 詔從前軍中

賞給錢糧皆特旨頒賜并無將臣自提賞需之例自福康安將兵所過之地濫支浮冒朕憫官兵久征勞苦其頒給額勒登保銀萬兩那彥成德楞泰各五千兩以充

軍賞別于四川藩庫支發不入軍需報銷以便清核

詔軍興以來各省督撫多借軍功保奏私人幕友親戚濫邀功賞如畢沅汪新所保胡齊嵩以貪冒伏法此外宜綿景安永保秦承恩勒保等所保豈可盡信其令吏部查嘉慶三年以前各省軍功人員注册進呈候朕稽核以慎名器

詔以賊起四載楚蜀秦豫匪有寧宇皆由諸臣防剿不力或偏徇隣境以塞責或偶獲賊首以邀功甚至擁兵避賊養寇殃民積薪不熄遂至燎原特罪狀永保縱賊湖北景安縱賊河南宜綿秦承恩縱賊陝西英善勒保縱賊四川惠齡縱賊渡漢江除景

安永保達交刑部擬重辟外秦承恩宜綿均遣戍伊犁英善以四品頂戴駐防西藏惠齡曾著微勞降級調用自後責成各督撫將帥各殲賊本境倘有逸出隣境者卽治以縱賊之罪其隣省邊備不嚴者卽治以疎防之罪上又以教匪強半脅從何以終不就撫聞福寧在湖北殺旗鼓寨降人二千餘邀功諒各路若此者多堅賊黨從逆之心失朝廷招撫之信命逮福寧交

刑部按殺降律定擬具奏是年九月明亮恒瑞破張漢潮于留壩賊殺馬騾塞山路由老林竄徽縣欲越洮河走階岷赴川明亮恒瑞慶成廣厚等四路會剿攻之雪

水河又圍之天賜山先後禽斬千餘探知山後懸厓奏言賊趨絕地必可殲滅賊復縋險宵遁老林明亮由寶雞大道北趨五郎邀之詔革明亮參贊大臣降爲

副都統時勒保逮入京師待罪而其弟永保復與明亮互相訐奏上命那彥成松筠會審適明亮與富成

等夾攻賊于五郎斬張漢潮生擒賊目李潮詔成

慶成興肇于新疆而永保明亮皆逮入京命那彥

成以欽差大臣率盛京吉林兵三千赴陝代明亮剿賊

額勒登保奏言臣數載以來止領一路偏師今蒙簡任

經略當通籌全局教匪本內地編氓原當招撫以散其

衆然必能剿而後可撫且必能堵而後可剿從前湖北
教匪多脅從少四川教匪少脅從多今楚賊盡偏入川
其與川東巫山大寧接壤者有界嶺之險可扼是湖北
重在堵而不在剿至川陝交界自廣元至太平千餘里
隨處可通陝攻急則折入川川攻急則竄入陝是漢江
南北則剿堵並重川東川北有嘉陵江以限其西南餘
皆崇山峻嶺居民大半依山傍水向無村落懲賊焚掠
近俱扼險築寨大者數千人亦數百家團練守禦而川
北形勢更便于川東若能驅各路之賊偏歸川北必可
聚而殲旃是四川重在剿而不在堵雖賊匪未必肯偏

歸一處。但使所至俱有堡寨。星羅碁布。而官兵鼓行隨其後。遇賊卽迎截夾擊。所謂以堵爲剿。寧不事半功倍。此則三省所同。臣已行知陝楚曉諭修築。并定賞格。以期兵民同心。蹙賊至從。征官兵每日過行百十里。旬月尙可耐勞。若閱四五年之久。無冬無夏。卽驟馬尙且踣蹙。何況于人。而續調新募之兵。不習勞苦。更不如舊兵之得力。臣之一軍。所以尙能得力者。實以兵士所到之處。亦臣所到之處。兵士不得食息。臣亦不得食息。自闔營將弁以及士卒。無不一心一力。而各路不能盡然。近日不得已。將臣所領之兵。與各提鎮互相更調。以期人

人精銳有

詔嘉獎其湖北之賊德楞泰破樊人傑

于竹山禽襲其位卜三聘于大寧乃進兵保康南漳賊
聞大軍至復分爲二一李樹徐天德掠歸州走還巴東
一辛聰張天倫竄宜昌之東湖德楞泰分兵斬李樹于
巴東破宋厥子于房縣賊由房縣老林西遁十月德楞
泰追楚賊入陝時高均德冉天元張天倫龍紹周唐大
信高天升馬學禮等皆屯聚白河洶河欲由紫陽西鄉
上游渡漢德楞泰分千餘兵防後路而自冒霧雨敗賊
于放馬場追斬千餘生禽高均德斬藍號張士虎

詔封德楞泰二等男授參贊大臣乘勝追至西鄉羣賊

盡驅赴通江南江德楞泰移兵入川與額勒登保夾剿額勒登保自九月奏偏賊歸川北之議卽分兵扼廣元棧道截藍白楊張二賊折回南江與王登廷阮正隆苟文明鮮大川合而許文謨所剿廣張二賊及七十五所敗之樊人傑徐天德亦由太平竄通巴界內十月額勒登保遣穆克登布等與七十五夾擊禽斬數百賊復竄東鄉太平乃使七十五朱射斗迎擊自楚折回之賊于雲陽而自與穆克登布等剿王登廷徐天德于開縣乾清門侍衛安祿中鎗死安祿故超勇公海蘭察之子也時川賊徐天德王登廷最悍出沒東鄉太平間復與自

陟折回之冉天元合恃其黨衆時時分竄以牽官兵阻
運道十一月額勒登保分兵二路攻賊于巴州黃成寨
賊方與寨勇相持山上官兵四面仰攻總兵春寧中傷
力戰不退額勒登保躍馬督戰賊披靡敗走白水碛遇
阿哈保等伏兵邀擊禽斬千餘由巴山老林追至南江
適德楞泰禽符曰明于廣元迎剿而至乃遣兵扼廣元
棧道防賊北竄而朱射斗亦敗張子聰于開縣柯藩敗
龍紹周于漢江徧回川境十二月進剿冉天元于蒼溪
額勒登保以冉天元善戰令楊遇春穆克登布合左右
翼全力擊之俟其敗卻再分隊繞擊穆克登布恃勇先

進繞出其前。楊遇春追其後。鏖戰山半。楊遇春右軍據舊寨垣。墻截拒。賊不能過。乃冒死突衝。穆克登布後帳。自顛壓下。左軍腹背受敵。短兵格戰。陷死副將以下二十四人。兵勇二百餘人。賊全力攻。經略中營血戰竟夜。黎明賊始退。旋禽王登廷于南江。先後具奏請罪。

詔以勝負兵家之常。前此諸將失利之事。何路無之。特諱匿不奏。今額勒登保先日拜疏。次日卽生禽王登廷。他人必謂前次臨陣生禽。而以陣亡各員分次入奏。拚敗爲功。額勒登保兩奏直陳無隱。而于緝獲賊首之鄉勇亦不攘爲己功。洵不愧經略大臣。卽其代具奏稿之

郎中胡思顯亦能體主帥之公忠從實入告其賞加三品卿銜時是月官兵追冉天元于開縣而德楞泰追鮮苟等賊亦至額勒登保病留太平遣楊遇春穆克登布等與德楞泰夾剿將一舉殄滅而川北賊楊開甲辛聰王廷詔高天升馬學禮等以川北寨勇守禦嚴難虜掠復乘間由老林北竄城固南鄭王文雄力疾禦之寧汧間賊分二路率制官兵其前路賊由略陽奪渡嘉陵江西犯秦隴而西鄉漢陰石泉紫陽江岸之賊亦紛紛由川偏陝額勒登保乃奏令魁倫督朱射斗百祥兩路兵勇八千與德楞泰合辦川北之賊而自率兵勇五千力

疾馳保寧赴陝時德楞泰聞川賊西犯秦隴勢急已率兵冒雪西上至漢中始奉額勒登保入川之檄則距川東已遠遂不復回軍入川亦西赴隴又那彥成接剿張漢潮餘黨冉學勝等于老林數月無效

詔責那彥

成擁萬餘勁兵不通籌全局惟與老林餘匪持久且盛京吉林勁旅舍騎而步尤爲非計致川陝交界各賊窺陝備空虛乘間北竄令以南山餘匪歸巡撫台布搜捕而與恒瑞移師赴北棧時略陽賊已驟渡白水江分寇秦州鞏昌提督吉蘭泰革職遣戍

命慶成以藍翎

侍衛赴鞏昌軍其平利賊樊人傑張天倫等五千餘亦

分犯二竹

詔以明亮宿將功多過少且藉其家貲

無幾

命以領隊大臣馳赴湖北額勒登保德楞泰

既相繼西上川東北兵備虛五年正月朔魁倫代統川
兵時冉天元等敗殘數百賊逃匿大竹且未渡渠河距
嘉陵江甚遠魁倫受事八日方發十五日尙在達州界
而賊已虜脅數千卽于是日由定遠奪渡嘉陵江虜脅
萬餘成都重慶同時震動魁倫不直趨渠縣而繞梁山
赴鄰水二十日始至由順慶渡江乃檄七十五回守重
慶七十五病不能軍總兵李紹祖將其兵赴川西
上以數載來賊氛所及皆在川東北其軍餉皆賴川西

川南協濟而魁倫按兵縱寇致川西完善腹地復遭蹂躪罪更浮于勒保先革職留任

詔德楞泰速由昭

化廣元回軍赴援並赦勒保以藍領侍衛赴川又調貴州兵五千

命總兵施璠援川西時蓬溪界成都重

慶之間賊渡江卽掠蓬溪魁倫遣朱射斗阿哈保百祥以兵三千進擊約自率後隊四千繼進及朱射斗兵二千逐賊交井場被圍數重衆寡不敵魁倫擁兵不援反回屯城內朱射斗力戰死百祥以千兵斷後亦幾殆射斗驍勇敢戰屢立功賊所憚者經略參贊外惟楊遇春及射斗兩鎮之兵至是以無援敗死官軍奪氣二月賊

由蓬溪分掠南部鹽亭射洪鹽泉嚙匪皆入之南部知縣王贊武有政聲單騎赴蒼溪賊營賊包正洪等羅拜拔營去至是復卑詞假道贊武率鄉勇二千奮擊死之射洪知縣張明葵自經死冉天元生日羣賊大會南充置酒作樂皆酣醉無官兵拚擊而魁倫自朱射斗敗後復以防潼河爲名退屯潼川益以李紹祖兵四千餘止令守沿河賊對岸焚綿州不出一兵援救難民數萬由金山驛渡潼河魁倫禁其舟不許渡知州劉卬全盡以西岸舟濟之乃免時賊已西犯梓潼江油將趨龍安與階岷諸賊合德楞泰兼程赴援邀擊江油之西遇冉天

元徐萬富陳德奉汪瀛四賊于馬蹄岡步騎數萬分路來犯我兵亦五路衝擊賊且戰且走至新店子忽伏賊起環攻我左右前三營圍溫春賽冲阿數重銃矢幾盡德楞泰以中軍馳救內外衝擊鏖戰至暮殺賊過當圍乃解生擒陳得奉斬冉天恒諸賊復走魏城驛與白號賊張子聰度向瑤雷士王合追及白家壩賊步騎數千誘戰諜報左右溝箐皆有伏賊欲截我後隊德楞泰戒諸軍勿下山追擊夜敗其刼營之賊時官兵僅五千賊數倍適阿哈保李紹祖及守備羅思舉以兵勇四千至軍三月詔授德楞泰成都將軍專辦川西之賊授

勒保四川提督。專辦川北之賊。責魁倫嚴守潼河。德楞
泰進搗江油。賊于重華驛。賊宵遁。分屯林菁口。德楞泰
遣兵扼龍安白水之路。轉戰而入。連奪險阨。賊大隊俱
屯馬蹄岡。而伏萬人于火石壩後。我兵四路進攻。德楞
泰督大隊直趨馬蹄岡。已過賊伏。數重始覺。賊伏起。八
路來攻。人持束竹濕絮以禦矢銃。鏖鬪三晝夜。賊更番
迭進不退。我兵飢疲。數路皆敗。德楞泰率親兵數十下
馬。據山巔。誓必死。冉天元督衆登山。直取參贊。德楞泰
乘高險大呼衝擊。一矢殪。冉天元之馬蹶而禽之。賊遂
瓦解。我山後鄉勇亦至。乘勝遂北二十里。飲羽怒追禽

斬無算。冉天元雄黠冠川，賊專用伏以陷官軍。曾敗經略兵于蒼溪，號令羣賊橫行川東、川北、川西，蹂躪數十州縣。至是，與官軍五日四戰，層層設伏，前賊却步，後隊及之，誓致死，決勝負。賴德楞泰血戰破之，生獲渠魁，爲賊起以來戰功最。

詔晉封三等子。賊衆尙萬餘，走屯劍州，設伏石門寨。前隊賊數千不戰而走。德楞泰曰：「此誘我也。」先攻其寨。寨據懸崖，惟南北二門。其寨西小徑尤險仄。德楞泰使官兵全力攻其西，抵而潛遣死士繞寨西小徑潰其柵，遂乘勢奪二門，斬墜千餘，生禽千八百。時賊不敢窺嘉陵江以西，將乘間闖潼河。

上

恐其南擾成都屢

勅魁倫嚴守魁倫反撤兵留船

致賊前隊得背渡焚太和鎮復大熾成都戒嚴

上

以魁倫兩次縱賊渡江使川西無完地褫逮治罪

命勒保以三品頂戴署四川總督率總兵施瑨所領貴

州兵由中江迎擊弁先誅冉天元于成都以防內變會

德勝泰追及渡潼之賊于渡口殲其後隊于次日及賊

達溪遣兵擊其分攻民寨之賊而大軍突擊賊于新店

子潰奔大銅山旗幟如林大呼脅從免死棄械散者二

千餘禽斬各千殲賊首雷士王孫嗣鳳獲器械牲畜無

算其分攻民寨之賊皆望風遁賊知大兵雲集川西且

成都有備。乃留白號張子聰。度向瑤掠川西。以綴官兵。而黃號徐萬富等復渡潼河。將趨嘉陵上游。以會階岷之賊。勒保截其後隊于太和鎮。乃議以川西賊付德楞泰。而白率施璿追潼河以東之賊。四月德楞泰破張子聰等。乘勝長驅。沿途難民隨虜隨散。破其騎賊于樂至。復邀擊於中江塘堰。隘間不能奔突。斬溺死者二千。生禽八百。追及潼河西岸。擊其未渡後隊二千。禽斬漂溺殆盡。潼河以西無賊。而勒保所追潼東之賊。屢謀渡嘉陵江。不遂。西走保寧。合白號賊衆尙萬。泗奪東岸三十餘舟。甫半濟而兩軍追及。驚潰赴水死者二千。磔沈。

其十餘舟生禽八百散其脅從千有四百獲牛馬器械
無算由是嘉陵江西亦無賊其渡江賊五千復爲達州
鄉勇禽其青號賊首汪瀛勢益衰將與川東北苟鮮諸
賊合而那彥成所剿敗之高天升馬學禮自大軍東還
後復襲脅二三千自階文折入龍安分掠松潘番地川
西復震乃議德楞泰山劍州趨廣元以遏黃白號賊竄
陝之路而勒保并將魁倫兵分禦龍安之賊時川北賊
以堡寨險鄉勇勁無可虜掠而陝境及嘉陵江岸復爲
官兵所扼乃羣竄川東苟文明犯巫山奉節鮮大川奔
開縣龍紹周唐大信擾太平又涪州有鶴游坪之賊羣

賊皆向雲萬分竄江岸將窺伺大江南渡德楞泰進軍開縣閏四月遣李紹祖追賊于岳池大竹遣許文謨追賊于梁山忠州而自敗藍號賊于長壽又連破白號賊于忠州梁山賊不敢笑江岸復竄開達而西五月德楞泰追白號張度二賊于達州屢斬獲僅餘數百盡棄衣糧器械奔東鄉太平時川東賊惟劉朝選湯思蛟各千餘李紹祖剿之其樊鮮苟龍唐冉張阮等賊并走川北官軍追及通江巴州而龍紹周唐大信已冒官兵紅旗走西鄉其勒保所剿龍安之賊遣薛大烈扼水泉關杜其折竄階文之路遣百祥敗賊于松潘而高馬二賊合

攻勒保營相持竟夜。適施璫由石泉迎剿而至。與大軍夾攻。大軍奪山衝壓。賊奔潰。突施璫兵奪路而走。施璫所將貴州新兵未練。陣動。施璫中矛死。初上以施璫江口之捷。賞貴州兵一月錢糧。至是勒保請停其賞。閏四月。賊奔老林。勒保分扼江油石泉安縣之路。賊數日無從掠食。而廣厚復以甘肅兵嚴守白水江。不得北渡。五月。賊復折入番地。路險騎踣斃七十五。病愈。與阿哈保敗賊于舊關。于新寨。進圍諸番地之鐵爐寨。賊乘雨夜竄。勒保乃回川北。而遣阿哈保七十五冒參贊德楞泰旗幟追擊。賊盡棄牲畜鎗矛。亡命山谷。由卓泥土。

司番地北走岷州聞官軍追急復走秦州初上命親王大臣同刑部會議魁倫罪請斬諸軍前上恐啟莠民玩視之漸詔逮至京是月賜自盡又

召侍郎廣興托津回京師其達州軍需以原任建昌道劉清總之初賊渡嘉陵江後魁倫使劉清防潼河及賊近鹽亭魁倫盡撤百祥等沿河兵勇回營劉清以太和鎮灘淺請留貴州兵協守魁倫不許賊果由此西渡反以疎防劾清上以清素得民免職留軍効力明年以禽賊功復其職云其湖北之徐天德樊人傑張天倫等賊倭什布孫清元先後截擊于均穀于房保于

南漳過其東竄三月總督倭什布降爲湖北巡撫以姜晟代之以長麟代松筠督陝甘四月明亮使孫清元擊樊賊興山使總兵王凱剿苟賊歸巴而自扼均房適中地迎剿徐天德于穀成禽斬八百賊遁入山將走南漳明亮沿漢江截其東北敗伏賊千餘王凱孫清元兩路亦驅樊苟二賊入川陝移兵會攻徐逆于南漳閏四月賊東向荊州時湖北軍皆步少騎而賊騎甚多每分路截官兵額勒登保分吉林勁騎二百自陝赴軍明亮孫清元及二竹鄉勇分路邀賊于宜城于荊門敗伏賊二千于天柱山又消河夏漲賊不能渡且戰且走復西竄

南漳初那彥成之移師而西也其南山餘匪亦分三隊
前二隊由棧道合川賊渡渭西寇秦隴勢猖獗那彥成
北出寶雞防其犯西安之路破賊隴山鎮禽斬三千散
出難民千獲牛馬三千餘

詔改授那彥成參贊大

臣賊不能北趨乃南犯伏羗復追敗之城外適德楞泰
亦迫王廷詔楊開甲自成縣至額勒登保亦力疾馳至
軍乃令德楞泰馳回川西恒瑞以兵三千回陝而自與
那彥成分兵三路一邀其入川二遏其北竄楊遇春穆
克登布破張天倫等於岷州慶成等破張世龍于洮河
二賊復合隊夜襲經略參贊大營爲官軍所敗乃分兵

追兩敗匪而大軍移剿高馬二賊扼其趨階州松潘之路賊轉岷州官軍間道邀擊慶成以勁騎衝入賊隊表裏夾擊又分破其伏賊禽斬千有七百三月各賊皆踰渭走東北官軍要王廷詔楊開甲等于隴州要高馬二賊于鞏昌皆偏回渭南而張世龍等又糾別賊由禮縣東走秦州將趨北棧乃議那彥成以兵五千留追高馬二賊于岷州而額勒登保并楊遇春岱森保兩軍皆回陝那彥成追及高馬二賊于文縣賊攻狼卡寨寨民萬餘岌岌賊拒據河高岸我兵以礮遙卻之軍乃得濟三路仰攻慶成率勁騎橫衝賊爲數隊潰奔石峽官軍扼

峽口前後圍攻賊自相蹂躪禽斬二千攀崖擠墜者屍
徧地散其脅從千餘餘千賊南竄將入川境卽陰平入
蜀路也那彥成以道險不利騎兵恐復蹈前此老林搜
剿之轍乃檄總兵百祥迎擊于龍安而自率兵回陝
上賁那彥成剿賊不盡將復蔓延棄前功而 詔

廣厚嚴備邊界時各賊先後奔陝額勒登保以川賊入
隴隴賊折泰皆必由棧道出入欲嚴扼各棧要害以堵
爲剿乃令王文雄等分扼南棧之鐵索關新集各隘總
兵索費英阿等分扼北棧之留壩江口方柴關各隘初
那彥成西行時以南山餘匪付巡撫台布時張漢潮餘

匪大半西竄留陝者僅數百而川賊五家營復至皆各
賊餘黨共七八千人時五郎以東民皆結寨野無可掠
銳意向東北台布使總兵劉之仁領精兵千並募練勇
獵戶千餘分伏間道扼其通鄖西商州兩路賊折奔鎮
安詔台布回漢中理餉曾恒瑞所追楊辛二賊數
千東奔山陽而張世龍張天倫二隊各萬餘爲經略大
兵驅偏出棧亦竄鎮安羣盜皆注漢北山內額勒登保
聲言出寶雞大道防賊北竄峪外而大軍追入老林逾
四日始出華陽賊由茅坪奔五郎山深無所掠日食驢
馬東向商雒額勒登保趨商州令楊遇春以精兵三千

扼龍駒寨。遏其赴豫。與恒瑞夾擊。先後禽斬二千餘。散其脅從千餘。賊始不敢東竄。額勒登保乃遣楊遇春剿學勝于孝義廳。而自移軍鎮安。與那彥成會。時商維各賊窺豫不遂。復折奔楚。楊辛等犯鄖西。樊人傑犯平利。乃議經略。參贊合兵自北而南。是月額勒登保那彥成會奏。請增兵三萬分屬。楊遇春慶成各當一面。與經略參贊五路辦賊。詔不許。而那彥成以所剿敗高馬。餘賊復熾。犯川西。破施。瑨兵坐前。縱賊罪。詔罷其軍機大臣及一切差遣。惟留尙書都統。復以諸將東馳西擊。未得要領。而軍情難遙度。命那彥成馳驛回。

京面詢方略。閏四月楊辛張天倫等圍恒瑞軍于西慶。成馳至夾攻走之。賊直趨渭南。額勒登保遣楊遇春。楊芳倍道扼其東竄。并遣兵守商維羣。賊議復西竄。惟留張漢潮餘黨三千在後。以綴官軍。楊遇春總扼兩河口。去路而大軍三路偪攻。連破之。大小中溪斬千有五百。合竄溪口。伏兵四面蹙之。溝水盡。赤生禽千餘。張逆餘黨殲焉。其楊辛二張伍戴等賊皆西行。五月額勒登保扼鎮安。而楊遇春穆克登布追賊破五金柱于首板崖。賊折奔山後。欲復由黑水河東竄山陽。適大軍三路要其前。楊遇春等兩路躡其後。二十里內之賊偪歸銅錢。

溝山後絕壁無路賊死突欲出溝口官兵數路圍攻先後禽斬五千餘我軍無一傷者進攻楊辛張等萬餘賊于茅坪人自爲戰斬賊七百賊走忽自驚折回擾亂蹂躪弃器械旗幟無算斬楊開甲釋其脅從千餘賊大隊西竄華陽而後隊東竄四畝地乃留楊遇春剿東賊而大軍西追時冉學勝張士龍等賊已突棧道徧秦州而高馬二賊亦由岷至秦州陝甘軍皆赴秦州會剿額勒登保嚴軍棧道是月那彥成至京召對屢失旨詔曰朕召見軍營之人原以其身歷戎行聞見自確異于遙度乃那彥成回京召對以來無一忠謀善畫游詞熒

聽純任私心甚至以籌兵籌餉議剿議堵皆爲無益如
螻蛄非人力所能捕盡惟委于劫數之未完其言令人
寒心而語及額勒登保德楞泰屢次奏捷則皆爲將信
將疑之詞意存忌妬以揜已老師南山縱賊隴西之失
其心實不可問那彥成外不能決勝千里內不能運籌
帷幄念其爲故大學士阿桂之孫姑革去工部尙書鑲
白旗漢軍都統降爲翰林院侍讀學士以示薄懲自後
川陝楚三處賊情惟以經略參贊及明亮三人奏報爲
憑自軍機大臣外毋得干預軍務是年 上以川北
賊因堡寨團練偏竄隴秦爲守禦成效始 詔陝西

湖北仿行並經畫南山鄖陽控制事宜令彙書于後備
籌邊者采擇

詔曰治流賊如治水水之奔潰必堤
以坊之故辦賊無出剿堵二端不堵其去路則剿無所
施不杜其虜脅則多剿無益以川陝楚情形而論川民
自結寨守禦以來賊艱掠食日剿日減卽潰竄數隊每
隊亦止千百未嘗有新增之賊何以一人陝界每隊輒
七八千良由漢中興安居民散處非如川民之自爲守
禦是以川東川北各賊每思竄往他境雖南山居民不
及川中之殷實而百姓亦嘗爲身家利害計多一自守
之民卽少一贅從之賊自後以剿捕責成領兵將帥而

團練守禦則責成各撫務期衆志成城人自爲戰限期
半載修築告竣其先籌畫以聞又

詔曰內地亂民

非同徼外夷虜原督撫應辦之事豈可全諉諸經畧參
贊近日州縣知賊不攻城往往閉關任其焚掠飽颺但
免失陷城池之律試思鄉村偶被刼盜地方吏尙有處
分况城外鄉鎮多有烟火萬家較城內更爲殷富如楚
之樊城沙市陝之龍駒寨蜀之太和鎮皆以無城被燹
生靈荼毒無算與失守城池何異其令陝甘湖廣督撫
嚴飭所屬山地則扼險結寨平地則掘濠築堡其團練
防守有效者保奏違者罪之又

詔曰川東川北寨

堅民奮遇賊偏近則各寨民百十成羣乘夜劫營使賊驚擾不得休息故小賊止出沒邊界不敢深入陝西雖近亦修堡但祇知自顧而任賊寨前奔逸或賊攻他寨卽不相援應其諭令聯絡聲勢與官軍犄角并亟查無堡寨之處及時修築又

詔曰近年費帑不下十千

萬調兵不下十餘萬而賊奔突滋蔓如故今後不必增兵并當汰去疲病之兵不在募勇但當圍集本地精練之勇三省年來徵調紛煩有此省之兵調往他省而本省又別調鄰省之兵彼此人地不習且多傷病留養徒糜餉費至鄉勇原爲保護鄉里而設若僅募他鄉游民

無田廬室家之戀。既去其鄉。安望其勇。目前則多報開銷。事後則易聚難散。何如省此養疲兵募散勇之資。以團練本地之鄉勇。實爲事半功倍。果盡如劉清尹英圖孔繼樞林嵐維昂等之寇。不能犯。又如勛西鄉勇之截禦齊姚劇賊。使官兵得以成功。何至民爲賊掠。兵爲賊疲。總之。他省未練之新兵。不如本地之鄉勇。而本省隔屬召募之鄉勇。又不如本鄉守堡之團勇。自後各縣練勇。各守堡寨。不許調往軍營。致村莊反遭荼毒。其鄉勇固守卡寨。以堵爲剿。及州縣實心倡率者。與軍功同賞。督撫能力行堅壁清野者。與經畧參贊同一酬庸。各以

本省錢糧供本省軍需不得復請兵餉又

詔曰剿

辦教匪非若邊徼外域必犁庭獻俘方可籌善後自應
隨剿隨撫而所撫之人不出三等一降賊二難民三鄉
勇既不能盡藉爲兵亦非徒給票回籍所能畢事其撫
綏之法亦有三或清查叛產或量給流亡絕產或于南
山老林墾荒暫免升科三事條緒繁重均賴良有司宣
力其令各舉所屬廉明公正之吏專司其事至終南山
綿亘八百餘里向歸岐山鳳翔武功盩厔郿鄠咸寧長
安藍田等縣分轄鞭長莫及又子午峪向禁行旅自畢
沅因遞送金川文報改道便捷較舊驛近七八程亦爲

賊踪出入要路。朕思難民就撫之後。無家可歸。莫若聽開山內老林墾地。刊木并相度形勢。分建廳縣。營汛彈壓。則就撫之民。卽成土著。不致流而爲匪。其五。郎廳爲山內適中之地。可設總兵鎮守。又湖北教匪奔竄。皆在鄖陽之二竹。實爲川陝楚要害。前明曾設鄖陽巡撫。宜增設鎮道大員。控制至鄉勇本地自行捍衛者。聚則爲兵。散則歸農。而外來雇募者。聚則爲兵。散則爲匪。今鄖陽五。郎議增營汛。其卽以鄉勇入伍充兵。無庸召募。所有應設營汛事宜。督撫議奏。此嘉慶四年秋至五年夏。那彥成爲欽差大臣。與經畧額勒登保。參贊德楞泰。收

復隴西川西及經理南山鄖陽始末也